



**ALTI HAIMELIGI  
VERSCHNUUFFER**

**Konkordanz – statt Hülfteschanz**

**175 Johr Fyr in Lieschtel  
100 Johr Kulturusstusch Kolumbie-Schwyz**

Es hän in Basel feyni Here  
de Rammel welle Mores lehre  
prompt dien die sich aifach wehre  
und Mores grad in Zores kehre,  
die gänn de Bebbi voll und ganz  
uff e Sagg bi dr Hülfteschanz.

**E grosse Freudedanz  
175 Joohr Hülfteschanz,  
bailamos todos, en todos modos.**

Syt denn mien d Basler schregglic lyde,  
kemme meh und meh in d Kryde.  
Gueti Stiirezaahler geehn ewägg,  
die Roote kimmeret das e Drägg.  
Basel sott e Zäntrum blybe,  
doch wär soll das alles rybe?  
Jetzt isch aifach d Kasse läär,  
dr Gang no Lieschtel schampar schwär,  
besser ass nit me mache kenne,  
isch, d Landschaft z bitte, fir is z brenne.

**E Fyr an dr Hülft vo dr SVP  
vo dr Basler Regierig hesch kaine gseeh.  
Hacen siesta a esta fiesta.**

Apropos brenne, s isch euses Füürli  
vor 50 Johr z Oberwil natüürli,  
d Basler Füürweehr isch scho do,  
drnoo sin d Oberwiler au no ko  
s isch euses Füürli, tschüss hän si gsait  
s wär schnäller glöscht gsi – z zwait.

**Firlifanz an dr Hülfteschanz  
und au e weneli Arroganz.  
Poco arrogancia, mucho Hülfteschancia.**

Konkordanz isch e schwiirig Kapittel  
wo ane kemme jetzt die Schpittel?  
«Euse Erich» het allewyl welle  
mit em Conti Schpittelbett zelle,  
mir mache do e jedi Wett,  
es fählen em no fuffzäh Bett.  
Aber hallo, dr Peter Zwick  
bringt si jetze au no digg.  
Sy gross Politiggeffasel,  
d Kinderklinik beider Basel,  
und das sygi ganz normal  
bruucht Lieschtel en Uni-Schpital.  
E Stössli vo Adrenalin  
zpenne mit dr Spitzemedizin,  
aagschlosse do an dryssig Kanüüle,  
finanziell gschtützt vo dr dritte Süüle.  
Das isch alles mega geil,  
wenn d Bebbi zaahle e grosse Dail.

**Dr Willimaa, c'est la vie,  
het shtatt e Hirni e Schtügg Brie.  
Ay que rico queso chico.**

E Stadt-Theater fir d Rambasse?  
Die intressiert jo numme s Jasse,  
Banndaag, Pulverdampf und Flieder,  
kai Goethe, Scheikspiir, Schiller Frieder.  
An e Theater ebbis zaahle,  
do dra dängge bringt scho Quaale.  
Binnige, Böttmige, Gälterkinde,  
sin sich ainig und si finde,  
villicht verirrt sich emol e Buur  
ins Theater, mir sin do nit stuur.  
Enorm, uns gfallt dä Gedangge,  
die stifte zämme tausig Frangge.

**Fir d Landschäftler SVP  
sin Basler «Sans Papiers».  
Sin papeles – bisch niemerts.**

Vo Schöönebuech bis Ammel  
was wän si no die Rammel?  
Ai Härz, ai Seel, si verkinde stolz  
vom Bölche bis zem Bruederholz  
– ebbis macht no vil vil stolzer,  
dasch Lütenegger Oberholzer –  
worum nit wieder emol d Vision  
vom ene Basler Vollkanton.  
S wurd besser funggtioniere  
wenn mir mit Ziri fusioniere.

**Los Bancos son Blancos  
Los Clientes son Negros.**

Die Alte Verschnuuffer gsehn global  
und dängge multinational,  
mir iebe aggtiiv Toleranz  
dasch by uns dägligi Usanz.  
Vo los Andes dien si ko,  
stehn bin is y und fyre so  
Cien años cultura Columbia,  
mache Fasnacht mit allem drum und dra.  
Si, vamos, uns duet das gfalle,  
mir kenne denn no säällic lalle,  
dasch internationali Konkordanz  
nit glaikariert – 175 Joohr Hülfteschanz.

D Ladääne-Uusstellig uff em Minschterplatz und d Waage- und  
Reggwisyte-Uusstellig bi dr Kasääne sinn vom Mäntig znacht  
bis am Mittwuch demorge, 2. bis 4. Hornig. Dert ka men au  
alli Zeedel und Schnitzelbängg, d Blagedde und dr Rädäbäng  
kaufe. Wotsch drumme oder pfyffe bi unsere Junge, ob Bueb  
oder Maitli – bi de Gnepf bisch willkumme!  
Uuskunft git: gnepf@verschnuuffer.ch